



TELE Greenland A/S

Ileqquusumik ataatsimeersuarneq

Tallimangorneq maajip 23-ani 2008 nal. 14:00

Siulersuisut siulittaasuata nalunaarutaa

TELE Greenland A/S-ip 2007-mi ukiumoortumik nalunaarusiaani ataatsimeersuarnermi akuersissutigineqartussatut inassutigaa. Nalunaaruteqarninni qulequttat pingaarutillit immikkut oqaaseqarfiginiaipakka.

Ukioq 2007 angusat inernerat

Siulersuisut sinnerlugit suliffeqarfissuup angusaa iluarisimaarlugu oqaatigissavara, tassalu akileraarutit suli ilanngaatinagit 118,1 mio. koruunit. 2006-imi angusat assersuutigalugit 106,7 mio. koruuniupput.

Ukiumi angusat qaffariarnerannut pingaaruteqarnerit tassaapput kaaviiartitat annertusinerat tamatumunngalu ilutigitillugu aningaasartuutit amerleriarsimannginnerat.

TELE-mi aamma POST-imi angusat patajaallisarneqarnissaat pingaaruteqarpoq, tamatumunnga pissutaavoq niuernermik ingerlatsiffiit taakku marluullutik siunissamut isigaluni annertuumik unammilligassaqarmata – assigiinngitsorujussuarnilli.

Teledivisionimut tunngasut tassaapput akileraarutit suli ilanngaatinagit 96,9 mio. koruunit. TELE-mi taamatut pitsaasumik angusaqarnerup ukiuni kingullerni selskabip aningaasaqarniarneranut patajaallisaanissamut pilersaarutip inernerivaa, pilersaarummut tunngaviuvoq oqaluttuarisaanermi aatsaat taamak annertutigisumik aningaasaliinissamut 2007-mi aamma 2008-mi telemi attaveqarnermut aqutissat nutaat 1 mia. sinnerlugit nalillit aningaasalersorneqarnissaat.

Kabelimut immap naqqatigoortumut Nunatta, Islandip aamma Canadap akornanni siaarneqartussamut tassungaannaq aningaasartuutissat 750 mio. koruuniupput. Tamatumunnga ilannguneqassapput radiokæde atorlugu illoqarfinnut aamma nunaqarfinnut attaveqaatinut aningaasaliissutissat, oqarasuaatinut angallattakkanut

TELE Greenland A/S

attaveqaatit, datanetti il.il. taamaaliornikkut attaveqaatinut aqqudit tamarmik naleqqussarneqarsimassapput kabelip immap naqqatigoortup 2009-p aallartinnerani atulernerqarnissaanut.

Attaveqaatit aqquutaannut aningaasaliissutit annertuut qulakkiissavaat annertunerusumik, pitsaanerusumik atugassaqartitsineq kiisalu Nunarput tamakkerlugu attaveqarnerup suli isumannaannerulerulernissaa. Tamakku saniatigut aningaasaliinerit aamma pisariaqarput ukiuni aggersuni akinik apparsaanissatsinnut tele atorlugu attaveqaqatigiittarnerup annertusiartornera ilutigalugu.

Januaarip aallaqqaataani 2007-mi akit 17 mio. koruunit nalinginik appartippavut, pisinnaasarpullu tamaat iliuuseqarpugut akinik appartitsisarnermut ileqqorisarput ingerlatiinnarniarlugu, tamatumuunakkut Nunarput tamakkerlugu inuit atuisugut kiisalu

inuussutissarsiuteqartut iluaqutissinniarlugit. Taamaattumillu aamma TELE-p Naalakkersuisut qinnuteqaateqarfigai oqarasuaatinut nalinginnaasunut nuna tamakkerlugu ataasiinnarmik akeqartitsineq atulersinniarlugu – taaguuserlugu nuna tamakkerlugu akigititaq.

Naalakkersuisut qinnuteqaat akuerissappassuk nuna tamakkerlugu akigititap naligilissavaa maannakkut illoqarfiup iluani akigititaq. Tamatuma kingunerissavaa juunip aallaqqaata 2008 aallarnerfigalugu Nunatsinni illoqarfiit akornanni sianerermut akit 55 %-it missaannik appartinneqarnerat.

TELE-p anguniagaraa pisisartuminut ajornannginnerpaaq, taavalu oqarasuaammik atuinermi nuna tamakkerlugu akigitinneqartoq ataasiinnaq atorneqalerpat aamma kommunerujussuarni nutaani illoqarfiit akornanni oqarasuaatinik qanoq atuitiginerup takunissaa nalunannginnerulissaaq.

Taamak annertutigisumik qaffasitsigisumillu aningaasaliissuteqarnermi aammattaaq pingaaruteqarpoq erseqqissassallugu piffissami aggersumi TELE-p malunnaatilimmik appasinnerusumik sinneqartoortarnissaa erniaannik akilersuinissaq nalikilliliinerillu pissutigalugit, aamma ingerlatsinerermut aningaasartuutit qaffattussaammata attaveqaatinut teknologimullu nutaanut tunngatillugu, tamakkulu Internettimik annertunerusumik atuinissap kingunerisussaavai.

Taamaattumik Internettimik atuinermi kaaviiartitat qaffakkiartuinnarnissaat tunngaviussatut pisariaqartuuvoq niuernermi ingerlatsineq tamanna pingaarutilerujussuaq TELE-mut akilersinnaasumik ingerlanneqassappat, taamaalilluni immap naqqatigut kabeliliinerup piffissaq ungasinnerusoq eqqarsaatigalugu imminut akilersinnaanissaa tunngavissaqalissaaq.

Kaaviiartitsineq akinut tunngasoq 2007-mi ataatsimut isigalugu 5 %-ingajannik qaffariarpoq.

Oqarasuaatinik angallattakkanik atuineq maannakkut oqarasuaatinik atuinermi annerpaajuvoq 2007-milu qaffariaat 2006-imut naleqqiullugu 7 %-ingajaavoq, naak 2007-p aallartilaarnerani SMS-imik atuinermut akigititaq 25 %-ingajammik appartinneqaraluartoq. Suli oqalulluni atuisarnermut isertitat qaffakkiartorput datanillu ingerlatsinermut kiffartuussivinni atuineq maannakkut annertungaatsiartumik qaffakkiartorpoq, naak Mbytemut akigititap 2007-p aallartilaarnerani 50 %-imik appartinneqaraluartoq.

Oqarasuaatinik nalinginnaasuunik atuinermi kaaviiartitsineq 2007-mi 10 %-ingajammik appariarpoq. Ukiup aallartinnerani Danmarkimut sianerermut aki 50 %-ingajammik 99 oorinut appartinneqarpoq. Tamakku saniatigut oqarasuaatinik nalinginnaasuunik atuineq oqarasuaatinik angallattakkanik aamma Internetti aqputigalugu oqarasuaateqarnermik (IP-telefoni) annertunerujartuinnartumik unammillerneqarput.

Ukioq 2007-p naanerani ADSL-imik atuisut 10.400-nit amerlanerupput ADSL-imillu atuinermi kaaviiartitsineq 40 %-it sinnerlugit qaffariarpoq.

Suliffeqarfiit aamma Internetti aqputigalugu (IP baseret tjeneste) sullissinernik atuinerat kaaviiartitsinerup qaffanneranut pissutaaqataapput.

Internetti aqputigalugu sullissinernik atuinermi kaaviiartitsinerup qaffariarnera TELE-p siunissamut pilersaarutimini ilimagisaanut naleqquppoq, kiisalu Internetti aqputigalugu sullissinernik atuinermi kaaviiartitsinerup ilaa tassanngaanneersoq naatsorsuutigineqarpoq ukiuni aggersuni TELE-p atuinermut akiliutitigut isertittagaanik kaaviiartitsinerup annerpaartarissagaa.

Postdivisioni akileraarutit suli ilanngaatinagit 2007-mi angusai tassaapput 17,9 mio. koruunit.

Ilanngaatissat ilanngaatigereernagit 2007-mi kaaviiartitat qaffariaateqalaarput 2006-imut naleqqiullugit. Qaffariaatit 2 %-ip missaanniipput, isertitaqarnerullu qaffariarneranut pissutaasut pingaarnerit tassaapput nassiussinermut akitigut isertitaqarneruneq kiisalu nunami namminermi allakkanik nassiussisarnertigut nipitittakkanik tuniniaanermi isertitaqarneruneq.

Danmarkimit allakkat amerlassutsimikkut ineriartornerat suli appariartorpoq, taamaattumillu Danmarkimit nassiussat akiisigut isertitaqarnerup allannguuteqannginnera anguneqarsimavoq akinik qaffasinnerusunik tunngaveqartumik, tassalu Nunatsinni nassiussinermut akit qaffanneqarnerisa kingunerisaannik.

Nipitittakkanik katersuisartunut nipitittakkanik tuniniaasarneq 2007-mi taamaaginnarpoq 2006-imut sanilliullugu, kisianni pisartutoqqat ukiui aamma niuernermit tassani nutaanik pisisartussaaleqineq suli unammillernartuuvoq.

POST-imi aningaasartuutit ingerlaavartumik annikillisarniarneqarput niuerfissanillu nutaanik periarfissanik POST-ip immikkut ilisimasaqarfigisaani ineriartortitsineq aallunneqartuarluni.

TELE-mut aamma POST-imut ilinniakkanut arlalinnut tunngatillugu nunaqavissunik amigaateqarneq suli siunissamut pilersarusiornermi unammillernaartuuvoq ilinniakkani piginnaaneqarnissamut piumasaqaatit annertusiartuinnarnerannut ilutigitillugu. Suliffeqarfiup soqutigisaraa suna tamaat atorlugu sulisut taakku nunaqavissut akornanni pissarsiarineqartarnissaat.

Ilinniartitaanernut aamma pikkorissartitsinernut aningaasarpasuit 2007-mi atornerqarput, agguaqatigiissitsillunilu sulisut tamarmik pikkorissarnernut ulluni sisamani – tallimani peqataasimapput. Tamakku saniatigut suliniutinut aningaasaliiffiineqartunut ingerlasunut teknikkimut aamma ilinniakkanut tunngasunik pikkorissartitsinerit amerlasuut naammassineqarput.

Taakku saniatigut TELE-p Namminersornerullutik Oqartussat suliffeqarfiutai angisuut allat pingaarutilimmik suleqatigilersimavai, tassalu piginnaanngorsaanertalimmik aqutsisussatut – sulisunullu ilinniarluarsimasunut ilinniartitaanerit neqeroorutigineqartut annertusarniarlugit suliniuteqarnermi.

TELE-mi aamma POST-imi siunissamut pilersaarummi qitiusunut ilaalluinnarpoq Nunatsinni suliffeqarfimmi ingerlatsivimmi ilinniagaqarnermut patajaatsumik tunngaveqarnissaq, tamaani ilinniakkaminnik naammassinneqqammersut suliassaminnik neqeroorfigineqarsinnaassapput isumassarsiffiusinnaasunik kiisalu ineriartorfiusinnaasunik suleqatigisanit misilittagaqarluartunit aquneqarlutik. Ilinniartitaaneq pitsaasoq kiisalu sulinermi misilittakkat patajaatsut suliffeqarfimmi atorfeqarnermi qaffakkiartornermi ineriartornermut tunngaviusumik piumasaqaataasutut isigaavut.

2008-mut isumalluaatit

TELE-divisionimi naatsorsuutigineqarpoq 2008-mi naatsorsuutit inernerat nalinginnaasoq 2007-mut naleqqiullugu appasinnerussasoq, tamatumunnga pissutaapput annertuumik aningaasaliinissamut pilersaarut kiisalu aningaasanik atorniartariaqarneq.

POST-imi naatsorsuutigineqarpoq 2008-mi 2007-mut naleqqiullugu annikinnerusumik naatsorsuutitigut angusaqarnissaq, tamatumunnga pissutaavoq allakkat nassiussat ikiliartuinnarnerat, naallu aningaasartuutit amerliartoraluartut 2008-mi nassiussat akiinik qaffaasimannginneq aamma pissutaallutik.

Naggataatigut sulisorpassuit pikkorissut pisortaasullu ukiumi qaangiuttumi sulilluarsimanagerat pillugu qutsavigerusuppakka, taamatuttaarlu siulersuisunut tamanut suleqatigiilluarsimanitsinnut qujanaq.

Kaj Egede

Siulersuisuni siulittaasoq